

Թողոյր Առ Վլատիսլաւ Դ. արքայ Լեհաց

ՔՐԻՍՏՈՍԱՊՍԱԿ և ծիրանածին աւգոստափառ և տիեզերակալ, Տերամբ զօրացեալ և Յիսուսի բարձրացեալ, և առաքինութեամբք աստուածայնովք և մարդկայնօք բարեվայելուչ զարդարեալ, որ և ուղղափառ հաւատով ծայրագոյն ճշմարտին հասեալ, և աներկեան յուսով ի ծայրագոյն բարձին յեցեալ, և սպասեալ հանդերձեալ երանութեան, և խանդակաթ սիրով ծայրագոյն բարւոյն բաղձացեալ, և յար ցանկութեամբ նորին զմայլեալ. խոհեմութեամբ պերճացեալ, արիութեամբ քաջացեալ, ողջախոհութեամբ և ժուժկալութեամբ զամենայն ցանկութիւն ընդ բանականին ըծով նուաճեալ. արդարութեամբ հաւասարակչիւ լեալ առ ամենայնս, ազատականութեամբ ուռճացեալ և մեծազոգողութեամբ բարգաւաճեալ, պարիսպամբութեան հաւատացելոց, և վէժ անվանելի ընդդէմ թշնամեաց խաչին. եղջիւր եկեղեցւոյ և պարծանք համայնց քրիստոնէից. ի ծայր նիզակի և ի վահան հատակառոյց ընկալեալ զսահմանս երկրի. միայնոյ թագաւորին երկնի և երկրի աթոռակալի և երկրորդ խնամողի, Քրիստոսասէր և ինքնակալ արքայի՝ Վլատիսլաւի Չորրորդի:

Յիսուսի Քրիստոսի ծառայ Փիլիպպոս կաթողիկոս ամենայն Հայոց, և փոխանորդ սրբոց առաքելոցն Բարթոլղիմէոսի և Թաթէոսի, եպիսկոպոսական և վարդապետական դասուք և ամենայն վիճակելովք մերովք՝ զքրիստոսաւանդն մասուցանեմք ողջոյն և օրհնութիւն աստուածապարգև մեծագոր թագաւորութեանդ: Եւ հայցեմք արտասուալից մաղթանօք ի միայնոյ թագաւորէն, զի զինքնակալ թագաւորութիւնդ ձեր անսասանելի և անվանելի պահեսցէ անկէտն յաւիտենիւ, հանդերձ արքայազուն և քաջազարմ աստուածասէր թագուհեաւդ և ծիրանածին զաւակօք, և ամենայն նախարարօք և մեծամեծօք, զօրապետօք և զօրօք, հնազանդելովք Չերովք, ըստ հաճոյից և բարեսէր կամաց իւրոց, պարագայց ամօք և երկարածիգ խաղաղական կենօք: Եւ յետ աստեացս թագաւորութեան՝ անվախճան թագաւորութեանն արժանի արասցէ հանդերձ նախնի թագաւորօք ձերովք, ընդ սուրբ թագաւորացն դասակից և պսակակից առնելով. ամէն: